

Exposición

“Medicina e Arte, outro Camiño”

Profesionais da Medicina que se dedican ás Artes Plásticas en Galicia

¿Que nos uniu ás persoas que estamos expoñendo aquí?

En primeiro lugar, unha profesión: a medicina.

En segundo lugar, unha afección: a expresión artística por medio da escultura, pintura, debuxo, gravado e fotografía.

¿Como se foi formando este colectivo?

Hai dous anos (abril 2007), unhas cantas persoas recibimos unha chamada telefónica de Mario Hortas (médico de Vigo) para contarnos que el máis Xosé García (médico tamén de Vigo) estaban a facer unha base de datos de profesionais da medicina que se dedican ás artes plásticas cando teñen tempo para iso...; mandounos un cuestionario, cubrímolos e devolvémosllo. Estaban recadando datos para faceren unha publicación.

Hai un ano (maio 2008), recibimos outra chamada telefónica, esta vez de Xosé García, para invitarnos a participar nunha exposición colectiva itinerante polo tramo galego do Camiño Xacobeo Francés ao longo do ano. Resultara que Xesús Vázquez (outro compañeiro do noso colectivo, de Lugo) estivera de armadanzas con Fernando Pensado (médico e alcalde de Palas de Rei) e chegaran á conclusión de que se podería facer a devandita exposición itinerante, despois falaran con Xosé e Mario, e puxéronse xa eles dous, xunto con Fernando e a Mancomunidade de Municipios Galegos do Camiño Francés, a montar a exposición, que percorreu ese Camiño concello a concello (Pedrafita, Triacastela, Samos, Sarria, Paradela, Portomarín, Monterroso, Palas de Rei, Melide, Arzúa e O Pino.), ata chegar a Compostela, onde a coordinei eu, para ir recalar, posteriormente, en Lugo, onde foi coordinada por Mercedes Hernández (médica de aló).

Este ano, Ignacio Granero organizou unha exposición do grupo no Barco de Valdeorras en xuño. É un encontro lúdico-festeiro no Carballiño (onde vive el, exercendo de médico na comarca do Ribeiro), en setembro, para tomar alí o mellor polbo do mundo, como compre.

¡E aquí estamos agora!, en Ribadavia, abrindo a porta para iniciar o Camiño Xacobeo Miñoto-Ribeiro. Camiño que pensamos percorrer, no seu tramo galego, concello a concello, a poder ser, ao longo do ano que ven (que é Ano Santo), coa exposición, colaborando así coa xente desta comarca que está traballando no intento de acadar unha meta: visibilizar este Camiño, promocionalo para que sexa outro máis e con máis peregríns dos que ten agora, e que todo iso sirva para mellorar a calidade de vida desta zona e os seus habitantes, e que todo isto leve á declaración deste Camiño Xacobeo Miñoto-Ribeiro como un dos Camiños de Santiago “oficiais”; meta que é moi importante, tanto para esta comarca do Ribeiro, como para toda Galicia.

Temos un camiño feito e un camiño por facer.

O feito xa é a parte galega do Camiño Xacobeo Francés, con 19 médicas e médicos participantes na exposición.

O que aínda está por facer é a parte galega do Camiño Xacobeo Miñoto-Ribeiro, que presentamos hoxe, día 9 de outubro de 2009, aquí, en Ribadavia, con 35 participantes na exposición.

Agardamos para o futuro máis exposicións e máis camiños, e tamén máis xente encantadora que coñecer, tanto dentro do grupo (porque, a pesares de ser profesionais da medicina todas as persoas que formamos este colectivo, obviamente moitos de nós non nos coñecemos persoalmente), coma fóra del: todas as persoas que nos acollen, apoian e acompañan, como é agora a xente que traballa no Concello de Ribadavia e os cidadáns de Ribadavia e do Ribeiro. Grazas por estar aí.

O noso sitio en internet é: <http://webs.uvigo.es/mpsp/medicarte>, nel pódense atopar datos, tanto da exposición esta que vai ter lugar en Ribadavia, dende hoxe ata o domingo 8 de novembro, inclusive, como de exposicións anteriores.

Lourdes Maceiras

Profesora da Área de Medicina Preventiva e Saúde Pública

da Universidade de Vigo

no Campus de Ourense